

四庫全書

史部

欽定四庫全書

欽定續通志卷一百九十八

宗室傳

金六

太宗諸子

宗磐

宗固

宗本

熙宗諸子

濟安

道濟

海陵諸子

光英

元壽

舒蕪鄂博

廣陽

世宗諸子

顯宗允恭

琮 璵 從憲 玠 從彛

永中

永蹈

永功 琦

永德

永成

永升

章宗諸子

洪裕

洪靖

洪熙

洪行

洪輝

德里

衛紹王子

從洛

宣宗諸子

莊獻太子

玄齡

守純

太宗十四子富勒呼呼魯呼拉布阿魯岱阿里布呼沙
呼阿林阿魯呼蘭呼爾察實圖美哈必蘓沃哩和碩

宗磐本名富勒呼天輔五年從都統杲取中京天會十年為古倫烏赫哩貝勒熙宗即位為尚書令封宋國王未幾拜太師與宗幹宗翰並領三省事熙宗優禮宗室宗翰沒後宗磐日益跋扈嘗與宗幹爭論熙宗前即上表求退熙宗因為兩解宗磐愈驕恣其後於熙宗前持刀向宗幹都點檢蕭仲恭呵止之既而左副元帥達蘭東京留守宗雋入朝宗磐陰相黨與宗雋

按此下至宗固傳為太保

右丞相並係原史闕文今據永樂大典輯補

時為右丞相用事達蘭屬尊功

多先薦劉豫立為齊帝至是倡議以河南陝西與宋使
稱臣熙宗命羣臣議宗室大臣言其不可宗磐宗雋助
之卒以與宋天眷二年宗磐宗雋達蘭謀作亂宗幹希
尹發其事熙宗下詔誅之赦其弟呼拉布等九人並赦
達蘭

宗雅本名呼拉布皇統二年封代王大定二年追封曹
王

宗偉本名阿里布天眷元年封虞王

宗英本名呼沙呼封滕王

宗懿本名阿林初封薛王追封鄭王

呼蘭天眷元年封冀王與達蘭謀反伏誅

宗美本名呼爾察初封豐王追封衛王

實圖美初封鄆王追封幽王

哈必蕪初封霍王追封瀋王

沃哩初封蔡王追封鄂王

宗哲本名和碩初封畢王追封韓王

宗順本名阿嚕岱天會二年薨皇統五年贈金紫光祿大夫後封徐王

宗固本名呼嚕天會十五年為燕京留守封幽王宗磐既誅熙宗使宗固子京往燕京慰諭宗固及冀王呼蘭伏誅或謂宗固等當絕屬籍熙宗不忍詔宗固等但不得稱皇叔其母妻封號從而降者審依舊典皇統二年宗固判大宗正六年為太保右丞相兼中書令明年薨海陵在熙宗時見太宗諸子勢彊而宗磐尤跋扈與呼

蘭相繼謀逆心忌之及篡立謁奠太廟韓王亨素號材
武使攝右將軍陰備太宗諸子遂與秘書監蕭裕謀去
宗本兄弟太宗子孫於是焉盡

宗本本名阿魯皇統九年為右丞相兼中書令進太保
領三省事海陵篡立進太傅領三省事初海陵心忌宗
本等勢強及篡立猜忌益深遂與祕書監蕭裕謀殺太
宗諸子誣以秉德出領行臺與宗本別因會飲約內外
相應使尚書省令史蕭玉告宗本親謂玉言宗美北京

留守卞俱言事不可遲只於日近圍場內予決因以馬
一匹袍一領與玉充表識物玉恐圍場日近身縻於外
不能親奏遂以告蕭裕裕具以聞蕭玉出入宗本家親
信如家人海陵既與蕭裕謀恐天下以宗本秉德輩皆
懿親大臣本無反狀裕構成其事使玉上變庶可示信
於是使人召宗本等擊鞠海陵先登樓命左衛將軍圖
克坦塔斯及蕭裕妹婿近侍局副使耶律必埒哩實達
爾密伺宗本及判大宗正事宗美至即殺之宗美呼爾

察臨死神色不變宗本已死蕭裕使人召蕭王附耳告之曰主上已誅宗本諸人欲加以反罪令汝主告其事今書汝告款已具帝即問汝汝但言宗本輩反如狀勿復異詞乃引見海陵王具如裕所教海陵遣使殺東京留守宗懿北京留守卞及遷益都尹畢王宗哲平陽尹稟左宣徽使京等家屬分置別所止聽各以奴婢五人自隨既而使人要之於路并其子男無少長皆殺之中京留守宗雅喜事佛海陵知其無能將存之以奉太宗

後召至闕竟殺之太宗子孫死者七十餘人海陵遂以宗本秉德等罪詔天下以玉上變實之使太府監完顏馮六籍宗本諸家大定二年追封潞京京卞並贈金吾衛上將軍

熙宗二子悼平皇后生太子濟安賢妃生魏王道濟濟安以皇統二年二月戊子生於天開殿熙宗年二十四始有皇子喜甚五日命名大赦天下三月甲寅告天地宗廟戊午冊為皇太子國初制度未立太宗熙宗皆

自安班貝勒即帝位至是始正名定制焉封皇后父太尉和坦為王隨朝職官竝遷一資十二月濟安病劇熙宗與后幸佛寺焚香流涕哀禱曲赦五百里內罪囚是夜薨謚英悼太子葬興陵側

道濟皇統三年命為中京留守以直學士阿蘭為都提點張玄素為同提點左右輔導之俄封魏王封其母為賢妃初居外至是養之宮中未幾熙宗怒殺之

海陵四子后圖克坦氏生太子光英元妃大氏生崇王

元壽柔妃唐古氏生宿王舒蕪鄂博才人南氏生滕王
唐陽

光英本名阿里布圖克坦養于同判太宗正方之家天
德四年二月立為皇太子其後養于永寧宮及圖克坦
舍音家貞元元年詔朝官京官五品以下奉引自通天
門入居于東宮光英頗警悟海陵謂侍臣曰上智不學
而能中性未有不由學而成者太子宜擇碩德宿學之
士使輔導之庶知古今防過失詩文小技何必作耶至

於騎射之事亦不可不習恐其懦柔也及將親征后與
光英挽衣號慟後誦孝經忽謂人曰經言三千之罪莫
大於不孝何為不孝對曰曰今民家子博奕飲酒不養
父母皆不孝也光英默然良久曰此豈足為不孝耶蓋
指言海陵弑母事及伐宋光英居守以圖們額哩頁為
太子少師兼河南路統軍使以衛護之完顏元宜軍變
海陵遇害都督府移文額哩頁殺光英于汴京死時年
十二後與海陵俱葬於大房山諸王墓次

元壽天德元年封崇王三年薨

舒蘇鄂博正隆元年四月生實達爾東勝家保養之封其母唐古氏為柔妃三年正月五日舒蘇鄂博薨海陵殺太醫副使謝友正醫者安宗義及其乳母杖東勝一百除名明日追封舒蘇鄂博為宿王葬大房山

滕王廣陽母南氏本大臬家婢隨元妃大氏入宮海陵幸之及有娠即命為殿直正隆二年九月二十六日生廣陽三年二月封南氏為才人七月封廣陽為滕王九

月薨

世宗十子昭德皇后生顯宗趙王蕝尼越王薩魯元妃

張氏生鄙王允中越王允功

按張元妃傳云生趙王允中而卒則允功疑非張氏

所生與此互異

元妃李氏生鄭王允蹈衛紹王允濟潞王允德

昭儀梁氏生豫王允成才人舒穆魯氏生夔王允升章

宗時避顯宗諱詔改允為永蘇尼薩魯皆早卒

顯宗皇帝諱允恭本諱呼塔噶皇統六年丙寅歲生大

定元年世宗即位封楚王二年賜名允迪五月壬寅立

為皇太子專心學問與諸儒臣講議於承華殿燕閑觀
書乙夜忘倦翼日輒以疑字付儒臣校證九月庠子詔
東宮三師對皇太子稱名少師以降稱臣十二月辛卯
奏曰東宮賀禮親王及一品皇族皆北面拜伏望天
慈聽臣答拜庶悖親親友愛之道世宗從之以為定制
世宗聞儒者鄭松賢起為左諭德詔免朝參令輔太子
讀書松以友諭自處帝嘗顧松使取服帶松對曰臣忝
諭德不敢奉命帝改容稱善自是益加禮遇四年九月

納妃圖克坦氏十月甲申裕享于太廟行亞獻禮七年
帝有疾詔左丞守道侍湯藥徙居瓊林苑臨芳殿調治
八年正月甲戌改賜名允恭庚戌受皇太子冊寶帝上
表謝九年五月世宗命避暑于草濼帝奏曰遠去闕廷
獨就涼地非臣子所安願罷行世宗曰汝體羸弱山後
高涼故命汝往八月至自草濼丙戌入見世宗曰吾兒
相別經夏極甚思憶也帝在承華殿經筵太子太保壽
王奕啓曰殿下頗未熟本朝語何不屏去左右漢官皆

用女真人帝曰諭德贊善及侍從官曷敢輒去奕揖而退帝曰宮官四員謂之諭德贊善義可見矣而反欲去之無學故也有使者自山東還帝問民間何所苦使者曰錢難最苦官庫錢滿有露積者而民間無錢以此苦之帝謂戶部尚書張仲愈曰天子富藏天下何必獨在府庫也因奏乞流轉使公私俱利世宗詔有司議行之十二年德州防禦使呼喇謀叛帝奏曰叔呼喇性荒縱耽娛樂而無子嗣忽如此狂謀望更閱實之十四年四

月乙亥世宗御垂拱殿帝及諸王侍側論及兄弟妻子之際世宗曰婦言是聽而兄弟相違甚哉帝舉思齊之詩以對曰臣等愚昧願相勵而修之因引棠棣華萼相承眷令急難之義為文見意以誠兄弟焉十九年詹事烏林阿入謝帝命取幞頭腰帶官屬請曰此見宰相師傅之禮也帝曰愿事陛下久以此加敬爾十一月改葬明德皇后于坤厚陵帝徒行輓靈車遇大風雪左右進雨具却之比至墳所衣盡霑濕觀者無不下淚海陵雖

貶黜為庶人宗幹尚稱明肅皇帝議者以為未盡帝具
表奏論世宗嘉納之宗幹降封遼王二十四年世宗將
幸上京詔帝守國作守國之寶以授之其遣使祭享五
品以上官及事利害重者遣之馳奏其餘常事並聽裁
決每三日一次於集賢殿受尚書省啟事世宗曰今巡
幸或能留三二年以汝守國譬之農家種田商人營利
但能不墜父業即為克家子也太尉左右丞參政皆國
家舊人可與商議且政事無難但用心公正無納讒邪

一月之後政事自熟帝流涕堅辭左右為之感動初帝在東宮中侍出入未嘗限阻及監國諭諸中侍曰我尙在東宮不親國政日與汝輩語今既守國汝等有召命然後得入五月世宗至上京賜敕書曰省方觀民古之制也汝守國任重夏暑方熾益當自愛無貽朕憂帝謂圖克坦克寧曰車駕巡幸以國事見屬刑名最重人之死生繫焉凡有可議當盡至公勿有廢事自是凡啓稟刑名帝自披閱召都事委曲折正移晷忘倦或賜之食

七月遣子金源郡王瑪達格奉表問起居請世宗還都
二十五年正月乙酉免羣臣賀禮帝自守國深懷謙抑
官臣不庭拜啓事時不侍立免朔望禮二月遣子金源
郡王瑪達格奉表賀萬春節四月久不雨帝親禱即日
霑足六月甲寅帝不豫庚申薨于承華殿世宗自上京
還次天平山好水川訃聞為位臨奠大慟親王百官皇
族命婦及侍衛皆會哭比至中都為位奠哭者凡七焉
謚宣孝太子殯于南園熙春殿帝事世宗凡巡幸西京

涼陘及上陵祭廟謁衍慶宮田獵觀稼拜天射柳未嘗
去左右上有事於圓丘及親享於太廟則行亞獻禮不
親祀則攝行祀事國有大慶則率百官上表賀正旦萬
春節則總班上壽十月庚戌朔宰相以下朝見於慶和
殿太尉完顏守道上壽世宗追悼悽愴者久之十一月
庚寅葬于大房山妃圖克坦氏生章宗次妃劉氏生宣
宗二十六年子璟立為皇太孫二十九年世宗崩太孫
即位是為章宗五月甲申追謚體道弘仁英文睿德光

孝皇帝廟號顯宗丁酉祔於太廟陵曰裕陵章宗尊諡
圖克坦氏為孝懿皇后宣宗尊諡劉氏為昭聖皇后庶
子承慶罕都阿林沃哩布摩囉歡

鄆王琮本名承慶母田氏後封裕陵克華性寬厚好學
世宗選進士有名行者納塔謀嘉教以女真小字及漢
字皆通習及長輕財好施不喜聞人過善吟咏至於騎
射繪塑之藝皆造精妙大定十八年封道國公二十六
年加崇進章宗即位遷開府儀同三司封鄆王明昌元

年授博索路烏赫哩哈達世襲明安留京師五年薨謚
莊靖改莊惠

瀛王瓌本名罕都琮同母弟工詩精於騎射書藝女真
大小字大定二十二年封崇國公加崇進章宗即位遷
開府儀同三司封瀛王明昌三年薨謚文敬其後帝謂
輔臣曰王性忠孝兄弟中最為善人故朕嘗令在左右
溫王雖幼亦佳不二旬俱逝良可哀悼

霍王從彛本名阿林母田氏早卒溫妃舒穆魯氏養為

己子大定二十五年封宿國公加崇進賜名瓚章宗即

位封沂王明昌四年詔追封故魯王永功為趙王以從

彛為趙王後

按越王永功薨於宣宗興定五年子三人福孫壽孫尼瑪哈本傳所載與永功傳殊

不相符永功字當屬訛誤

承安元年為兵部尚書改封蔡四年除祕

書監泰和五年賜今名八年封霍貞祐二年薨

瀛王從憲本名沃哩布母劉氏後封裕陵茂儀大定二

十六年賜名琦章宗即位加開府儀同三司封壽王永

安元年以郊祀恩進封英四年改封瀛泰和五年更賜

今名六年授祕書監八年薨從憲風儀秀峙性寬厚善騎射待府僚以禮秩滿去者皆有贖帝尤愛重及薨帝諭判大睦親府事究王永升曰瀛王家事叔宜規畫聞其二姬方孕若生子即以付之謚敦懿

溫王玠本名摩囉歡母王氏後封裕陵婉儀玠溫厚好學章宗即位加開府儀同三司封溫王明昌三年薨謚悼敏

鎬王永中

按衛紹王紀云章宗時避顯宗諱改
允為永故宗室表及諸傳俱從改名本名薩

喇勒又名烏遜大定元年封許王五年判大興尹進封
越王趙王拜樞密使十九年子寶古納加光祿大夫是
歲改葬明德皇后于坤厚陵永中母元妃張氏陪葬十
一月庚申永中以元妃柩先發使執黃繖者前導俄頃
皇后柩出磐寧宮顯宗徒跣少府監張謹言呼執黃繖
者不應既葬謹言欲奏其事顯宗解之乃止二十一年
改判大宗正事永中不悅顯宗勸之曰宗正之職自親
及疎自近及遠此親賢之任也且皇子之貴豈以官職

閑劇為計邪永中乃喜二十四年世宗幸上京顯宗居
守并留永中顯宗先遣章宗宣宗奉表問起居於上京
既而遣永中子寶古納奉表世宗喜謂豫國公主曰皇
太子孝德天成兄弟之際相友愛如此也二十五年六
月世宗在太平山顯宗薨於中都詔曹王永功視章宗
名永中赴行在加開府儀同三司明年復為樞密使是
歲世宗賜諸孫名永中四子寶古納曰瑜寶圖美曰璋
阿索美曰玘鄂蘭哈瑪爾曰瑒章宗即位以永中判西

京留守進封漢王加實古納銀青榮祿大夫鄂蘭哈瑪爾奉國上將軍明昌二年正月辛酉孝懿皇后崩吳王永成隋王永升奔喪後期各罰俸一月杖其長史五十永中適有寒疾不能至帝怒頗意諸王有輕慢心遣使責永中二月丙戌禫祭永中始至壬辰及諸王朝辭賜遺留物禮遇雖在而嫌忌自此始矣四月進封并王三年判平陽府事進封鎬王初置王傅府尉官名為官屬實檢制之府尉希望風旨過為苛細永中自以世宗長

子且老矣動有掣制情思不堪乃表乞閑居詔不許四年鄭王永蹈以謀逆誅增置諸王司馬一員檢察門戶出入毬獵游宴皆有制限家人出入皆有禁防河東提刑判官伯勒赫坐私謁永中杖一百解職前近侍局副使費摩克爾森嘗受永中請託為實古納求除官克爾森坐免故尚書右丞張汝弼永中母舅也汝弼妻高托噶自大定間畫永中母像奉之甚謹挾左道為永中求福希覬非望五年高托噶坐詛祝誅帝疑事在永中未

有以發也會鎬王傅尉奏永中第四子鄂蘭哈瑪爾因防禁嚴密語涉不道詔同簽大睦親府事掌御史中丞孫即康鞠問并求得第二子實美圖所撰詞曲有不遜語家奴德格首永中嘗與侍妾瑞雪言我得天下子為大王以爾為妃詔遣官覆按狀同再遣禮部尚書張暉兵部侍郎烏庫哩慶裔覆之帝謂宰臣曰鎬王祇以語言得罪與永蹈罪異參知政事馬琪曰永中與永蹈罪狀雖異人臣無將則一也詔以永中罪狀宣示百官雜

議皆請論如律詔賜永中死實圖美鄂蘭哈瑪爾等皆
棄市敕有司用國公禮收葬永中平陽府監護官給葬
具妻子威州安置泰和七年詔復永中王爵謚曰厲敕
實古納於威州擇地以禮改葬歲時祭奠貞祐二年詔
徙永中妻子實古納等於鄭州三年太康縣人劉全嘗
為盜亡入衛真界詭稱愛王所謂愛王妄指實古納也
全欲為亂因假以惑衆誘王氏女為妻又召東平妖人
李寧於高山寧至推為國師議僭立事覺皆伏誅四年

潼關破徙永中子孫于南京興定二年亳州譙縣人孫
學究私造妖言云愛王終當奮發有劉二者出而當之
結構逆黨市兵仗大署旌旗謀僭立事覺誅死者五十
二人永中子孫禁錮自明昌至正大末幾四十年天興
初詔弛禁錮未幾南京亦不守云

鄭王永蹈本名尼楚赫大定十一年封滕王進封徐王
二十五年加開府儀同三司明年為大興尹章宗即位
判彰德軍節度使進封衛王明昌二年徙封鄭王三年

改判定武軍初崔溫郭諫馬太初與永蹈家奴畢慶壽
私說讖記災祥畢慶壽以告永蹈郭諫頗能相人永蹈
台相已及妻子諫言大王相貌非常王妃及二子皆大
貴永蹈又召崔溫馬太初論讖記天象崔溫曰丑年有
兵災屬兔命者來年春當收兵得位郭諫曰昨見赤氣
犯紫微白虹貫月皆主丑後寅前兵戈潛亂事永蹈深
信其說乃陰結內侍鄭兩兒伺起居以崔溫為謀主郭
諫馬太初往來游說河南統軍使布薩揆尚永蹈妹韓

國公主永蹈謀取河南軍為助與妹澤國公主長樂謀使駙馬都尉富拉塔致書於揆且先請婚以觀其意揆拒不許使者不敢復言不軌事永蹈家奴董壽諫永蹈不聽董壽以語同輩奴遷嘉努上變時永蹈在京師詔平章政事完顏守貞參知政事胥持國戶部尚書楊伯通知大興府事尼瑪哈鑑鞠問連引甚衆久不能決右丞相爪爾佳清臣奏曰事貴速絕以安人心於是賜永蹈及妃卞玉二子安春愛紳公主長樂自盡富拉塔崔

溫郭諫馬太初等皆伏誅布薩揆雖不聞問猶坐除名
董壽免死隸監籍遷嘉努特遷五官自是諸王制限防
禁密矣泰和七年詔復王封備禮改葬賜謚曰刺以衛
王永濟子阿禪為永蹈後奉其祭祀

越王永功本名桑阿又名廣孫貞元二年生沈默寡言
笑勇健絕人涉書史好法書名畫大定四年封鄭王七
年進封隋王十一年進封曹王十五年除刑部尚書諭
曰侍郎張汝霖汝外舅行也可學為政十七年授庫庫

圖世襲明安十八年改大興尹世宗幸金蓮川始出中
都親軍二蒼頭縱馬食民田詔永功杖蒼頭各一百彈
壓百戶二人失覺察勒停永功奏曰親軍人止一蒼頭
兩彈壓服勤為日久矣請量決蒼頭使彈壓待罪償其
田直皆從之有老嫗與男婦憇道傍婦與所私亡去嫗
告伍長蹤跡之有男子私殺牛手接血刃望見伍長意
其捕已走避之伍長疑是殺若婦也捕送縣問尸安在
詭曰棄之水中矣求之果獲一尸已半腐縣吏具獄上

永功曰婦死幾何日而尸遽半腐哉頃之得若婦於所私者永功曰是男子以殺人就獄其拷掠足以稱殺牛之科矣遂釋之武清黃氏望雲王氏豪猾不逞永功發其罪畿內肅然二十三年判東京留守改河間尹闕月改北京留守帝以永功在北京為政無良戒敕永功諭其長史俾匡正之改東京留守從幸上京明年皇太子薨詔永功護喪事尋拜御史大夫與章宗及趙王永中皆加開府儀同三司明年判大宗正事應州僧與永功

有舊將訴事于彰國軍節度使伊喇呼喇求永功手書
與呼喇為地呼喇得書奏之帝謂宰臣曰永功以書囑
事雖細微不可不懲也凡人小過不治遂至大咎有犯
必懲庶幾能改是亦教也於是解職未幾復判大宗正
事章宗即位除判平陽府事進封冀王永功之官隨引
醫人沈思存過制限當解職帝曰此事當痛斷監奴及
治府掾長史管轄府事者罪仍著于令家奴王唐犯罪
至徒永功曲庇之平陽治中高德裔失覺察笞四十於

是永功改判濟南府尋授山東西路博羅科世襲明安
二年判廣寧府事進封魯王明年判彰德府事永安元
年進封郟王明年判太原府事泰和七年改西京留守
八年復判平陽府事大安元年進封譙王判中山府事

明年進封越王

按衛紹王紀大安元年十二月進封凡
越王永功為譙王是由越而改譙也與

傳互
異

宣宗即位免常參明年從遷汴京興定五年有疾

賜尚醫診視是歲薨謚忠簡子福孫壽孫尼瑪哈大定
十六年詔賜福孫名璐壽孫名璿尼瑪哈名琳璐加奉

國上將軍章宗即位加銀青榮祿大夫封蕭國公

璿本名壽孫字仲實一字子瑜

按歸潛志云密國公璿世宗之孫越王永常之

子考世宗子無名永常者則志誤也

資質簡重博學有俊才喜為詩工真

草書大定二十七年加奉國上將軍明昌初加銀青榮

祿大夫衛紹王時加開府儀同三司貞祐中封胙國公

正大初進封密國公璿奉朝請四十年日以講誦吟詠

為事時時潛與士大夫唱酬然不敢明白往來永功薨

後稍得出游與文士趙秉文楊雲翼雷淵元好問李汾

王飛伯輩交善初宣宗南遷諸王宗室顛沛奔走疇乃
盡載其家法書名畫居汴中家人多俸少客至貧不能
具酒肴疏飯共食焚香煮茗盡出藏書談大定明昌以
來故事終日不聽客去樂而不厭也天興初疇已卧疾
論及時事輒慨嘆時曹王出質疇見哀宗於隆德殿奏
曰開額爾克欲出議和額爾克年幼不諳練恐不能辦
大事臣請代其行哀宗慰止之於是君臣相顧泣下未
幾以疾薨年六十一平生詩文甚多自刪其詩存三百

首樂府一百首號如菴小叢第五子守禧字慶之風神秀徹瑋特鍾愛年未三十而卒

潞王永德本名思禁大定二十五年加開府儀同三司二十七年封薛王二十九年判秘書監進封瀋王明昌時授山東東路博羅科必喇明安進封幽王遷勸農使承安二年進封潞王三年再任勸農使衛紹王時累遷太子太師宣宗即位改同判大睦親府事興定五年遷判大睦親府事子鄂倫賜名琰

豫王永成本名鶴野又曰羅索風姿竒偉博學善屬文
世宗尤愛重之大定七年封瀋王以太學博士王彥潛
為府文學永成師事之十一年進封幽十五年就外第
累遷翰林學士承旨判定武軍節度使事尋改判廣寧
府二十五年世宗幸上京命留守中都判吏部尚書進
開府儀同三司為御史大夫章宗即位進封吳判真定
府事明昌元年改山東西路佛們必喇明安明年進封
充坐率軍民圍獵解職未幾授沁南軍節度使歷判太

原平陽府事承安改元以覃恩進封豫明年冬進馬八十匹以資守禦之備賜詔嘉獎五年召還泰和四年薨謚曰忠獻永成自幼喜讀書晚年所學益醇每暇日引

文士相與切磋接之以禮未嘗見驕色自號曰樂善居

士有文集行於世

按歸潛志云豫王永中好文善歌詩有樂善老人集行於世今考宗室表

及本傳豫王實名永成永中乃鎬王也

夔王永升本名錫卜察一名鶴壽大定十一年封徐王進封虞王二十六年加開府儀同三司章宗即位加恩

宗室徙封隋王除定武軍節度使明昌二年改封曹又
改封宛衛紹王即位徙今封貞祐元年薨

章宗六子欽懷皇后生絳王洪裕資明夫人林氏生荆
王洪靖諸姬生榮王洪熙英王洪衍壽王洪輝元妃李
氏生葛王德里

洪裕大定二十六年生是時顯宗薨逾年世宗深感及
闡皇曾孫生喜甚滿三月宴於慶和殿御酒歌歡乙夜
方罷二十八年十月丙寅薨明昌三年追封絳王賜名

洪靖本名阿古喇明昌三年生王生而警秀章宗所鍾
愛四年薨永安四年追封荆王賜名加開府儀同三司
洪熙本名訛會不明昌三年生未彌月薨永安四年追
封榮王賜名加開府儀同三司

洪衍本名撒改明昌四年生未幾薨永安四年追封英
王賜名加開府儀同三司

洪輝本名訛論永安二年五月生彌月封壽王十月丁
亥薨備禮葬

德里泰和二年八月生帝久無皇嗣祈禱于郊廟衍慶宮亳州太清宮至是喜甚彌月將加封三等國號無愜帝意者念世宗在位最久年最高初封葛王遂封為葛王三年薨

衛紹王六子從恪瑤瑄瑛餘二人名不傳

依宗室表補

從恪衛紹王長子大定二十六年賜名又賜名明安曰瑤安春曰瑄阿禪曰瑛泰和七年詔追復鄭王永蹈王爵備禮改葬命阿禪為鄭王後守其祭祀大安元年封

子六人為王從恪胙王有任王羣王餘弗傳是歲從恪為左丞相二年八月立從恪為皇太子至寧末呼沙呼弒衛王從恪兄弟皆廢居中都貞祐二年徙鄭州四年徙居南京天興元年崔立以從恪為梁王汴京破死焉

宣宗四子莊獻太子守忠哀宗守緒立齡荆王守純

依宗

室表

補

莊獻太子名守忠呼沙呼既廢衛王時宣宗未至即迎守宗入居東宮貞祐元年閏九月甲申立為皇太子十

月己未以鎮國上將軍太子少保阿婁罕為太子少師
庚申諭曰朕宮中每事裁減汝亦宜知撙節又謂曰時
方多艱每事當從貶損吾已放宮人百餘矣東宮無用
者亦宜出之二年五月

按宣宗紀遷汴在貞祐二年五月此訛作四月謹據改

宣

宗遷汴留守中京七月召至汴三年正月薨葬迎朔門
外謚莊獻五月立其子鏗為皇太孫始二歲十二月薨
四年正月賜謚沖懷太孫

立齡早卒未封爵或曰莊獻太子母弟或曰麗妃史氏

所生

荆王守純本名幫圖貞祐元年封濮王二年為殿前都
點檢兼侍衛親軍都指揮使權都元帥上諭帥府曰濮
王年幼公事殊未諳卿等母以朕子故不相規戒凡見
將校令謙和接遇可也三年為樞密使四年拜平章政
事興定元年授世襲東平府路三屯明安三年進封英
王時監察御史程震言具不法宣宗切責杖司馬及大
奴尤不法者數人初

原文作四年九月按宣宗紀興定
三年十二月誅高琪四年九月誅

木舍布坐誅本傳總繫
之四年殊誤今改正

守純欲發丞相高琪罪密召知

案布希薩喇勒令史富察呼嚕員外郎王阿里謀之屬令勿泄而薩喇勒呼嚕輒以告都事布薩訥木舍布訥木舍布白高琪及高琪伏誅守純劾三人者泄密事訥木舍布處死除名薩喇勒呼嚕各杖七十勒停元光二年三月壬子諭守純曰始吾以汝為相者庶幾相輔不至為人譏病耳汝乃惟飲酒耽樂公事漫不加省何耶今諸相皆老臣每事與之商略無貽物議足矣十二月庚

寅宣宗病篤守純趨入侍哀宗後至聞守純在宮分遣
樞密院官及東宮親衛軍總領伊喇布哈集軍三萬餘
屯東華門外部署定扣門入宰相巴古喇已遣人止丞
相高汝礪不聽入宮以護衛四人監守純於近侍局是
夕宣宗崩哀宗即位進封荆王罷平章政事判睦親府
封真妃龐氏為荆國太妃或告守純謀不軌下獄推問
慈聖宮皇太后言於帝由是獲免守純三子長曰額爾
克封肅國公天興元年二月進封曹王出質於軍前次

曰某封戴王次曰伯特封鞏王守純及宗室皆死青城

欽定續通志卷一百九十八

欽定四庫全書

欽定續通志卷一百九十九

宗室傳

元一

烈祖諸子

伯勒格台

太祖諸子

卓沁

圖喇

睿宗圖類

伊克圖

太宗諸子

定宗諸子

憲宗諸子

烈祖五子長太祖皇帝次楚齊格爾王次哈準大王次

特默格鄂齊錦所謂皇太弟國王鄂齊爾諾延者也次

伯勒格台王

按原史以四宗為一卷諸帝子孫為一卷俱不列標題今依世次列叙而以世系表

標題冠於其首并無傳者亦備為錄入以補其闕畧云

宗王伯勒格台性純厚明敏多智略不喜華飾勇力絕

人幼從太祖平諸部落掌從馬其子孫最多嘗從太祖
宴諸部族或潛圖害之以刀斫其臂傷甚帝大怒欲索
而誅之王曰今將舉大事於天下豈可以臣故而生釁
隙哉請勿治帝尤賢之當創業之初征取諸國王摧鋒
陷陣不避艱險帝嘗曰有伯勒格台之力哈扎兒之射
此朕所以取天下也嘗立為國相又長扎爾古齊別授
之印賜以蒙古百姓三千戶及廣寧路恩州二城又以
鄂諾奇嚕之地建營以居江南平加賜信州路及鈐山

州二城王薨子曰罕都呼曰伊蘇布哈曰昆布哈

按世系表

伯勒格台子長曰伊蘇布哈次昆布哈次罕都呼與此互異

罕都呼性剛猛知兵從

憲宗征伐多立戰功罕都呼子曰呼喇濟以疾廢世祖
俾居于恩以統其藩入至大三年呼喇濟薨子達春嗣
達春性謙厚通經史能撫卹其民云伊蘇布哈子卓多
中統三年始以推戴功封廣寧王昆布哈領兵河南屢
建大功子二曰默爾格特曰昂吉爾台

太祖六子長卓沁太子次察罕台太子次太宗皇帝次

圖類即睿宗也次烏拉齊無嗣次科爾戩太子

卓赤沁太祖長子也國初以親王分封西北其地去京

師數萬里以故郡邑風俗皆莫得而詳焉

按皇子卓沁攻城略地之

功詳見太祖紀故本傳畧而不載

卓沁薨子巴圖嗣巴圖薨弟薩喇達

嗣薩喇達薨弟孟克特穆爾嗣孟克特穆爾薨弟托克

托孟克嗣托克托孟克薨弟托克托嗣托克托薨弟布

呼嗣布呼薨弟伊濟貝嗣至元二年伊濟貝遣使來求

分地歲賜以賑給軍站三年中書請置總管府至大元

年伊濟貝斃

按世系及諸王表寧肅王托克托至大元年對今考本傳托克托再傳至伊濟貝而

伊濟貝實斃于至大元年必有一誤

子嘉鼎巴嗣其位下舊賜平陽晉州

永州分地歲賦中統鈔二千四百錠自至元五年始給

之

圖喇太祖次子察罕台四世孫也少以勇力聞大德十一年春成宗崩左丞相阿固台等潛謀立安西王阿南達而推皇后巴約特氏稱制仁宗歸自懷孟引圖喇入內縛阿固台等以出誅之大事遂定武宗即位第功封

越王以紹興路為其分地圖喇居常怏怏有怨望意至大元年秋武宗幸涼亭將御舟圖喇前止之言涉不遜帝銜焉既而大宴萬歲山圖喇醉解其腰帶擲諸地瞋目謂帝曰爾與我者止此爾帝並疑其有異志二年春命楚王伊克圖等鞠之辭服遂伏誅子西安王喇特納實哩天歷初以推戴功進封豫王

睿宗景襄皇帝諱圖類方太祖崩時太宗留和博之地國事無所屬圖類實身任之聞燕京盜賊白晝剽掠遣

齊爾烏爾圖薩哈勒往窮治之盜始息己丑八月太宗
即位明年伐金命圖類帥師以從破天城堡拔蒲城縣
聞金平章哈達參政布哈守西邊遂渡河攻鳳翔會前
兵戰不利從太宗援之辛卯春破洛陽河中諸城太宗
還官山大會諸侯王謂曰人言耗國家者實由寇敵今
金未殄實我敵也諸君寧無計乎圖類進曰臣有愚計
非衆可聞太宗屏左右問之其言秘人莫知也鳳翔既
下有降人李昌國者言金恃黃河潼關之險爾若出寶

雞入漢中不一月可達唐鄧圖類然之言于太宗太宗大喜遂以中軍自碗子城南下渡河由洛陽進汪沁諾延以左軍由濟南進而圖類總右軍自鳳翔渡渭水過寶雞入小潼關沿漢水而下期以明年春會于汧遺綽布干詣宋假道且約合兵宋殺使者圖類怒曰彼昔遣苟夢玉來通好遽自背盟乎乃分兵攻宋諸城堡長驅入漢中進襲四川臨閬州過南部而還遂由金取房前鋒三千人破金兵十餘萬于武當山趨均州渡漢水遣

貴徹訥率千騎馳白太宗太宗遣慰諭圖類亟合兵馬
圖類既渡漠金將哈達設伏二千餘萬于鄧州之西據
隘待之時圖類兵不滿四萬得諜報乃輕騎以進及金
人戰于禹山佯北以誘之金人不動圖類舉火夜行金
哈達聞其且至退保鄧州攻之三日不下遂將而北為
金人所襲殺傷相當壬辰春哈達等知圖類已北合步
騎十五萬躡其後圖類按兵遣將呼圖克等誘之曰且
暮令軍中曰毋令彼得休息宜夜鼓譟以擾之太宗時

亦渡河遣親王昆布哈等將萬餘騎來會天大雨雪金人僵凍幾不能軍圖類即欲擊之諸將請俟太宗至圖類曰機不可失遂奮擊于三峰山大破之追奔數十里流血被道資仗委積餘衆逆走睢州伏兵起又敗之哈達走鈞州僅遺數百騎布哈走汴復禽獲之太宗尋至顧謂圖類曰微汝不能致此捷圖類從容對曰臣何功之有此天之威皇帝之福也聞者服其不伐從太宗攻拔鈞州獲哈達攻許州又拔之收定河南諸郡四月由

半渡入真定過中都出北口住夏於官山會太宗疾甚
圖類禱于天地請以身代居數日太宗疾愈圖類從北
還至阿爾哈達遜之地遇疾而薨子十一人妃奇味氏
生憲宗及世祖憲宗立追謚曰英武皇帝廟號睿宗配
享世祖至元三年按睿宗改謚及莊皇后追謚世祖紀
書于至元三年祭祀志所載亦因本
傳原文均誤作改謚景襄皇帝按睿宗至大二年復加
二年今改正尊謚曰仁聖景襄皇帝
其冊文見元文類未傳未載謹附識追謚奇味氏曰莊聖皇后升祔睿宗
廟室至大二年十二月加謚顯懿莊聖皇后

伊克圖祖父博綽睿宗庶子也博綽之母曰瑪克實尼瑪察氏博綽驍勇善騎射憲宗時北征有功賜號巴圖爾賜蠶州三千三百四十七戶為其食邑博綽娶察罕默爾奇氏生實喇卜嘉勒實喇卜嘉勒娶鴻吉哩氏生伊克圖伊克圖年十三世祖命襲其祖父統軍至元十二年從北安王北征十三年錫里濟叛遣人誘脅之伊克圖不從事王益忠謹博爾歡巴圖魯尼堪與海都通相率引去王遣伊克圖追之擒博爾歡等以獻未幾錫

里濟永和爾圖卜特穆爾等反以兵攻王生致伊克圖
拘繫之困辱備至十四年鄂爾和達巴延帥師討叛錫
里濟永和爾迎戰伊克圖潛結齊勒特穆爾托克托呼
亂其陣因得脫走帝聞之賞賚甚厚十八年加封耒陽
州二十一年命與托克托呼同討海都伊克圖先進邏
得謀人知其虛實直前衝敵陣破其精兵海都敗走以
功賜鈔幣鎧甲弓矢其後北安駐特穆爾河納顏額布
根有異圖引兵趨吉魯爾河大帳伊克圖將三百騎進

至阿哈齊地會王帳下蘇達蘇部兵逃去伊克圖諭之
使還時徹伯爾圖呼嚕古台誘蒙古軍二萬從納顏伊
克圖知之夜襲其軍突入帳中遇呼敦默爾根幾獲之
間道逸去二十七年海都入寇時托多爾海居守大帳
詔伊克圖同力脩禦軍未戰而潰妻孥輜重悉為永和
爾莽賚特穆爾所掠伊克圖與其子托里特穆爾相失
獨與十三騎奔還世祖撫慰嘉歎賜爵鎮遠王

按諸王表伊克

圖子至元二十一年封鎮遠王此云二十七年互異

以鴻吉哩氏女賜之又命居

北安王第二帳王薨帝命掌大帳固辭成宗立命常侍
左右武宗撫兵漠北請以子托里特穆爾從大德五年
海都都勒幹合軍入寇托里特穆爾將兵擁護力戰功
多成宗崩安西王阿南達與莽賚特穆爾窺望神器伊
克圖曰世祖皇帝之嫡孫在神器所當屬安西藩王也
入繼非制武宗即位以其父子勞効忠勤益厚遇之進
封楚王以鴻吉哩氏為楚王妃托里特穆爾襲封鎮遠
王至大三年徹伯爾來歸宗親皆會伊克圖進曰昔我

太祖有訓世祖誦之臣與有聞治亂國者宜以法齊之
所以辨上下定民志今請有以整飭之則人有所勸懲
惟陛下鑒之帝嘉納其言伊克圖薨仁宗命托里特穆
爾嗣楚王延祐中明宗西出托里特穆爾坐累徙西番
没入其家貲之半明宗即位詔復故號人民貲帑悉歸
之托里特穆爾薨子巴圖爾立巴圖爾薨有子三人曰
雅克特穆爾曰蘇克特穆爾曰多羅布哈雅克特穆爾
嗣時年十有二鴻吉哩氏哈扎爾駙馬之女孫蘇喀實

哩皇后之從妹也

太宗七子長定宗皇帝次奎騰太子次庫春太子次哈

喇徹爾王次哈斯大王次哈坦大王次默呼大王

原注憲宗

紀有云太宗以子月良不材故不立為嗣今考經世大典世系篇及歲賜錄並不見月良名字次序故不載

定宗三子長呼察大王次諾果太子次和和太子

憲宗五子長巴爾圖大王次烏蘇岱大王次玉隆哈寶

大王次河平王錫里濟次瓊都早卒無嗣

欽定續通志卷一百九十九

欽定四庫全書

欽定續通志卷二百

宗室傳

元二

世祖諸子

裕宗珍戩

顯宗噶瑪拉
庫春布哈

特穆爾布哈
順宗達爾瑪巴拉

成宗一子

武宗諸子

仁宗諸子

恭定帝諸子

文宗諸子

順帝諸子

世祖十子長多爾濟王次皇太子珍戩即裕宗也次安
西王莽噶拉木次北安王諾木罕無後次雲南王和克
齊次阿雅噶齊大王次西平王鄂囉齊次寧王庫庫楚
次鎮南王托歡次和塔拉特穆爾王

裕宗文惠明孝皇帝諱珍戩母昭睿順聖皇后鴻吉哩氏少從姚樞竇默授孝經中統三年封燕王守中書令丞相史天倪入啓事王曰我幼未嘗習祖宗典則一旦當大任惟汝耆德是賴復諭贊善王恂曰省臣所啓國事也爾宜入與聞之四年兼判樞密院事嘗從幸宜興世祖違豫憂形于色夕不能寐聞母皇后暴得風疾即悲泣衣不解帶而行至元七年秋受詔巡撫青海至冬還京間謂諸王札拉呼及從官巴延等曰吾屬適有茲

暇宜各悉乃心慎言所守俾吾聞之於是色埒默曰太祖有訓欲治身先治心欲責人先責己巴延曰皇上有訓欺罔盜竊人之至惡一為欺罔則後雖出善言人終弗信一為盜竊則事雖未覺心常惴惴若捕者將至札拉呼曰我祖有訓長者稍深者底蓋言貴有終始長必極其杪深必究其底不可中輟也王曰皇上有訓毋持大心一持事即應敗吾觀孔子之語即與聖訓合也十年二月續通鑑立為皇太子仍兼中書令判樞密院事

作三月

九月詔立宮師府設官屬三十有八員起處士楊恭懿于京兆太子嘗有疾世祖臨幸親和藥以賜之遣侍臣李衆馳祀嶽瀆名山川太子戒其所至郡邑毋煩吏迎送重擾民也詔以侍衛親軍萬人益隸東宮太子命王慶瑞董士亨選其驍勇者教以兵法時閱試焉太子服綾袷為瀋所漬命侍臣重加染治侍臣請更製之太子弗許東宮香殿成工請鑿石為池如曲水流觴故事太子曰古有肉林酒池爾欲吾效之耶每與諸王近臣習

射之暇輒講論經典若資治通鑑貞觀政要王恂許衡
所述遼金帝王行事要略下至武經等書片言之間苟
有允愜未嘗不改容時侍經幄者如王恂白棟皆朝夕
不出東宮而待制李謙太常宋衛尤加咨訪焉十八年

正月

世祖紀
作二月

昭睿順聖皇后崩太子自獵所奔赴勺飲

不入口者終日設廬帳居之命宋衛擇可備顧問者衛
以郭祐何瑋徐琰馬紹楊居寬何榮祖楊仁風等為言
太子曰盡為我致之宜自近者始遂召瑋于易州琰于

東平及王恂卒太子聞之嗟悼嘗顧謂左右曰王贊善
隨事規正良多裨補今鮮其匹也時阿哈瑪特擅國重
柄太子惡其姦惡未嘗少假顏色及盜殺阿哈瑪特和
爾果斯入相太子戒之曰阿哈瑪特死于盜手汝任中
書誠有便國利民者毋憚更張中書啓以何瑋參議省
事徐瑛為左司郎中瑋瑛入見太子諭之曰汝等學孔
子之道今始得行宜盡平生所學辟楊仁風于潞州馬
紹于東平復辟楊恭懿同置省中議事以衛輝總管董

文用練達官政與恭懿同置省中詔割江西龍興路為
太子分地太子謂左右曰安得治民如邢州張耕者乎
於是召宋衛大選署守長江西行省以歲課羨餘鈔四
十七萬緡獻太子怒曰朝廷令汝等治百姓百姓安錢
糧何患不足盡卻之阿里以民官兼課司請歲附輸羊
三百太子以其越禮罷之參政劉思敬遣其弟思恭以
新民百六十戶來獻太子問民所從來對曰思敬征重
慶時所俘獲者太子蹙然曰歸語汝兄此屬宜隨所在

放遣為民毋重失人心烏蒙宣撫司進馬踰歲獻之額
即諭之曰去歲嘗敕勿多進馬恐道路所經數勞吾民
也自今其勿復然二十年春辟劉因子保定拜右贊善
大夫以吏部郎中瓜爾佳之奇為左贊善大夫是時已
立國子學李棟宋衡李謙皆以東宮僚友繼典教事至
是命因專領之而以衡等仍備咨訪嘗曰吾聞金章宗
時有司論太學生康費太多章宗謂養出一范文正公
所償顧豈少哉其言甚善會劉因以疾乞去二十二年

以長史耶律有尚為國子司業遣使辟宋工部侍郎倪
堅于開元既至訪以古今成敗得失賜酒日昃乃罷太
子在中書日久明於聽斷四方州郡科徵輓漕造作和
市有係民休戚者聞之即日奏罷至元以來天下太平
人材輩出太子優禮遇之在師友之列者非朝廷名德
則布衣節行之士德意未嘗少衰其大雅不羣本於天
性中外歸心焉於是世祖春秋高江南行臺監察御史
言事者請禪位於太子太子聞之懼臺臣寢其奏不敢

遽聞而小人以臺臣隱匿乘間發之世祖怒甚太子愈益懼未幾薨年四十有三成宗即位追謚曰文惠明孝皇帝廟號裕宗祔于太廟

顯宗光聖仁孝皇帝諱噶瑪拉裕宗長子也其母曰徽仁裕聖皇后鴻吉哩氏噶瑪拉少育於祖母昭睿順聖皇后日侍世祖畏慎不妄言言必無隱至元中奉旨鎮北邊叛王永和爾等望風請降既而都勒幹徹伯爾諸王遣使求和邊境以寧嘗出征駐金山會大雪擁火坐帳

內謂左右曰今日風雪如是吾與卿處此猶有寒色
彼從士腰弓矢荷刃周廬之外其苦可知遂命饗人大為
肉糜親嘗而徧賜之撫循部曲之暇則命頽默根以國
語講通鑑戒其近侍台哈布哈曰朝廷以藩屏寄我事
有不逮正在汝輩輔助其或依勢作威不用我命輕者
論遣大者奏聞宜各慎之使百姓安業主上無北顧之
憂則予與卿等亦樂處於此乃所以報國家也二十六
年世祖以其居邊日久特命獵于柳林之地率衆至鄴

州恐廩膳不均令左右司之分給從士仍飭其衆曰汝等飲食既足若復侵漁百姓是汝自取罪譴無悔衆皆如約民賴以安北還覲世祖于上京世祖勞之曰汝在柳林民不知擾朕實嘉焉明年冬封梁王出鎮雲南所至未嘗橫取於民二十九年改封晉王移鎮北邊統領太祖四大鄂爾多及軍馬達勒達國土中書省臣請為王置內史世祖從之遂以北安王傅托輝梁王傅茂巴爾斯雲南行省平章賽音並為內史明年置內史府又

明年世祖崩王聞訃奔赴上都諸王大臣咸在王曰昔皇祖命我鎮撫北方以衛社稷久歷邊事願服厥職母弟特穆爾仁孝宜嗣大統於是成宗即位而王復歸藩邸大德六年正月薨年四十五天性仁厚御下有恩尤為朝廷所重然崇尚浮屠歲耗財不可勝計子三人元妃生伊蘇特穆爾次蘇克繼次德勒格爾布哈仁宗即位謚王獻武英宗遇弒伊蘇特穆爾以嗣晉王即皇帝位是為泰定帝追尊曰光聖仁孝皇帝廟號顯宗祔享

太室上元妃尊諡曰宣懿淑聖皇后升祔顯宗廟文章
即位乃毀其廟堂

順宗昭聖衍孝皇帝諱達爾瑪巴拉裕宗第二子也母
曰徽仁裕聖皇后鴻吉哩氏至元初裕宗為燕王達爾
瑪巴拉生于燕邸明年詔裕宗居潮河八月召至京師
凡乘輿巡幸及歲時朝賀未嘗不侍裕宗以行二十二
年裕宗薨達爾瑪巴拉以皇孫鍾愛兩宮優其出閣之
禮二十八年始詔出鎮懷州行至趙州從卒有伐民桑

棗者民遮訴于道連爾瑪巴拉怒杖從卒以懲衆未至以疾召還明年春世祖北幸留治疾京師越兩月而薨年二十有九子三人長曰阿穆爾克封魏王曰哈尚是為武宗曰阿裕爾巴里巴特喇是為仁宗大德十一年

夏

按本紀武宗即位在大德十一年五月其上順宗尊諡即係是時本傳作十一年秋誤今改正

武宗

即位追諡曰昭聖行孝皇帝廟號順宗祔享太廟

庫春布哈世祖之孫鎮南王托歡子也

按世系表托歡長子曰婁章婁

章次子曰庫春布哈則是托歡之孫也與傳互異

泰定三年封威順王鎮武昌

文宗天歷初詔賜金幣仍鎮湖廣縱集賽等官侵奪民
利民頗患苦之至元五年太師巴延矯制召赴京貶之
及托克托為相始明其無辜命復還鎮至正二年湖北
廉訪司糾言庫春布哈恃宗室恣行不法不報十一年
徐壽輝亂庫春布哈與其子拜特穆爾塔斯特穆爾引
兵至金剛臺壽輝部將倪文俊敗之執拜特穆爾十二
年壽輝偽將鄒普勝陷武昌庫春布哈棄城走詔追奪
其印十三年克復武昌及漢陽十四年詔庫春布哈討

賊有功復鎮武昌還其印十六年命與宣讓王特穆爾布哈以兵鎮遏懷慶未幾復還武昌命其子報恩努接岱努佛嘉努以大船四十餘水陸並進至沔陽攻徐壽輝偽將倪文俊且載妃妾以行兵至漢川縣雞鳴汊水淺不能行文俊以火焚其船接岱努佛嘉努皆遇害報恩努自死妃妾皆陷庫春布哈走陝西

按順帝紀漢川之敗在至正十

五年本傳敘于十六年鎮遏懷慶之後與紀互異

二十五年候巴延達實奉庫

春布哈自雲南經蜀轉戰而去至成州欲之京師李思

齊以取蜀為名扼不令行俾屯田于成州以沒其子曰和尚者封義王侍從順帝左右多著勞効至正二十四年博囉特穆爾稱兵犯闕遂為中書右丞相總握國柄恣為淫虐和尚忿其無君數言于帝受密旨與儒士徐士本謀交結勇士上都瑪勒巴延岱爾等陰圖刺博囉特穆爾明年七月博囉特穆爾入奏事行至延春閣巴延岱爾奮出斫中其腦上都瑪勒等競前斫死之二十八年順帝將北奔詔准王特穆爾布哈監國而以和尚

佐之及京城將破即先遁不知所之

特穆爾布哈世祖孫鎮南王托歡第四子也

按宗室表托歡止生

三子曰婁章曰曼濟曰布達實哩至特

穆爾布哈則婁章之子也與此傳異

初世祖第九子

托歡封鎮南王出鎮揚州薨子婁章襲封婁章薨弟圖

卜布哈襲圖卜布哈薨子博囉布哈幼特穆爾布哈乃

嗣為鎮南王文宗天曆二年博囉布哈已長特穆爾布

哈請以其位復還之朝廷嘉其讓改封宣讓王移鎮廬

州順帝至元五年已延擅權矯制貶特穆爾布哈及威

順王庫春布哈至托克托為相言兩王皆無辜詔令復
還鎮至正十二年廬州境內賊起特穆爾布哈用廉訪
使陳思謙言命以所部兵及諸王奇塔特等分道擊賊
擒其渠帥境內皆平帝賜金帶銀鈔以賞其功十六年
命與庫春布哈以兵鎮遏懷慶路既而汝潁之寇南渡
淮特穆爾布哈復以便宜調芍陂屯軍拒之及廬州不
守乃挈身北歸留京師二十七年進封淮王二十八年
明兵逼京師順帝北奔詔以特穆爾布哈監國城破死

之年八十三

成宗一子皇太子德壽蚤薨

武宗二子長明宗皇帝次文宗皇帝

仁宗二子長英宗皇帝次安王烏特古斯布哈蚤隕

英宗皇帝無子

泰定帝四子長皇太子阿勒濟雅巴次晉王巴特瑪雅

爾藏布次錫錫太子次允丹藏卜太子俱蚤隕

明宗二子長順帝次寧宗皇帝

文宗三子長皇太子喇特納達喇蚤薨無後次雅克特古斯太子次太平訥太子俱蚤隕

寧宗皇帝無子

順帝三子長皇太子阿裕實哩達喇餘二子蚤世



欽定續通志卷二百

欽定四庫全書

史部

欽定續通志卷二百一
四

通禮司副使臣施朝幹覆勘

總校官原任侍講臣王燕緒

欽定四庫全書

欽定續通志卷二百一

列傳

臣等謹按司馬遷序公侯以下有世家列傳之別彪固繼作併為一科鄭氏通志本取法史記而世家止錄周人列傳下終隋代蓋以漢晉以後雖有封爵之制究與三代分民胙土傳序相授者不同不可更立世家故一以列傳概之從班書例也臣

等今奉

詔續修自唐迄元以次纂輯亦準夾漈之例一概稱傳
惟是唐及五代皆有新舊二書體例各殊詳畧互
見其中事蹟彼此矛盾者未易枚舉苟非折衷以
歸於一無以傳後而信今至於宋元諸史卷帙尤
繁其中或一事而屢書一人而兩傳倘如鄭氏原
書抄襲舊文畧無增損竊恐疊床架屋徒多而不
適於用無以稱

聖朝述作之旨昔司馬遷之為列傳事越千年卷裁七十李延壽修南北二史列傳卷帙減原書什六則夫通史之作體尚簡嚴其來久矣臣等竊取斯義裁割眾家凡正史所載事之無關法戒人之無足重輕者稍芟雜之且史以紀治忽之迹非取辭章之工如魏徵陸贄之論事劉蕡之對策皆經國名言所宜備錄至韓愈進學解平淮西碑柳宗元貞符與許孟容書之類文雖工而無裨於政治亦概

從刪若夫載籍極博傳聞或殊自正史而外遺文
古事足資考證者靡不叅核異同折衷至當其可
徵信者則增入正文其當兩存者則附之分注其
或史文舛謬加以駁正亦必依據古書匪敢自逞
臆見事增而文省擇精而語詳以期仰副我

皇上稽古右文實事求是之盛意是則臣等續鄭氏之
書而未敢規規學步者也

唐一

竇建德

薛舉 仁果

李軌

劉武周

苑君璋

高開道

劉黑闥

徐圓朗

臣等謹按班孟堅漢書改史遷之例以陳勝項籍為列傳之首自後史家咸宗之范蔚宗後漢書首列聖公盆子以及公孫述隗囂等傳陳承祚魏志亦首列董素劉呂諸傳蓋草昧羣雄皆為興朝驅除史家叙述其事以見創業之艱難於例固不可畧也唐新舊二史以李密王世充竇建德等為列

傳首益取斯例但考李密王世充二人隋書已為
列傳鄭樵通志業經采入茲既續鄭氏之書不宜
複載自竇建德以下則以類叙次分為二卷云

竇建德貝州漳南人

按新史建德自言漢景帝太后父
安成侯之裔及僭號使人祠觀津

先墓事涉傳
會今不取

少重然許材力絕人鄉人喪親貧無以葬

建德方耕聞之太息遽解牛以給喪事盜夜劫其家建
德立戶下盜入擊三人死餘不敢進請其尸建德曰可
投繩係取之盜投繩建德乃自縻使盜曳出躍起捉刀

彼殺數人繇是益知名為里長犯法亡會赦歸久之父
卒里中送葬千餘人所贈予皆讓不受隋大業七年募
兵伐遼東建德補隊長方如軍會邑人孫安祖盜羊為

縣令捕劾笞辱

按舊書及通鑑俱云安祖家為水所漂
妻子餒死縣以安祖驍勇亦選在行中

安祖辭貧白言潭南令令怒笞之
與此異此據新書及隋季草命記

安祖刺殺令亡抵建

德建德陰舍之時山東饑羣盜起乃謀曰今水潦為災
民力凋敝主上不是恤而親駕臨遼且往歲西征十不
一返創夷未復又重發兵人情危駭易以搖動丈夫當

建功於世渠為亡命虜乎我聞高雞泊廣袤數百里葭
亂阻奧可以違難承間竊出掠殺足以自資因得聚豪
傑且觀時變以就大計安祖然之建德為招無賴少年

數百人使安祖率之入高雞為盜安祖為摸羊公

舊書
自稱

將軍通
鑑同

時郇人張金稱亦結眾萬餘依河渚間僭人高

士達兵千餘屯清河鄙上諸盜往來漳南多殺掠獨不
入建德間郡縣意建德與賊通捕族其家建德至河間
聞家屠滅即率麾下三百人亡歸士達士達自稱東海

公以建德為司兵安祖為金稱所殺其下數千人歸建德眾益盛至萬人猶保高雞泊傾身接物執苦與士卒均由是能致人死力十二年涿郡通守郭絢率兵萬人討士達士達自以智力不及建德乃推為軍司馬以兵屬焉建德使士達守輜重自以精兵七千迎絢詐為亡狀遺絢書約降請前驅執賊自效絢信之引兵從建德至長河界兵懈不設備建德襲殺其軍數千人絢以數十騎去追斬於平原隋遣太僕卿楊義臣討破張金稱

於清河乘勝欲遂入高雞泊建德謂士達曰隋善將獨
義臣耳新破金稱其鋒不可當引兵避之彼欲戰不得
軍老食乏乘之可有功士達不納留建德守壁身將兵
逆戰置酒享士建德聞曰東海公未捷遽自矜大禍至
不日矣隋兵勝必長驅而來吾不能獨支乃留衆保壁
帥銳士據險待後五日義臣斬士達於陣追北薄壘守
兵潰建德以百餘騎走饒陽饒陽無備因取之義臣已
殺士達謂餘黨不足憂引去故建德得還平原為士達

發喪招潰卒得數千人軍復振自稱將軍初佗盜得隋官及士人必殺之唯建德思過甚備引故饒陽長宋正本為客尊任之參決軍議隋郡縣吏多以地歸之勢益張眾至十餘萬十三年正月築壇場於河間樂壽自立

為長樂王建元丁丑

按大業十三年歲在丁丑建德以丁丑紀元必在其歲新書繫之十

四年誤又大業十四年即唐武德元年也新書建德傳先書大業十四年又書武德元年亦誤今並考正署

官屬分治郡縣七月隋右翊衛將軍薛世雄

通鑑作左禦衛大將

軍涿郡

通守督兵三萬討之屯河間七里并建德以勁兵伏

旁澤中悉拔諸城偽遁世雄以為畏稍弛備建德率敢死士千人襲之會大霧晝冥隋軍驚潰相騰藉死者如邱世雄引數百騎亡去盡得其眾獲河間丞王琮勞遣之琮復嬰城建德進攻未下明年河間食盡聞煬帝遇弑琮率吏發喪棄城大臨建德遣使入吊琮因請降建德為退舍飭饌具琮率郡屬素服面縛軍門建德親釋之麾下或言河間久拒守多殺士今力窮而下請烹之建德曰琮誼士也吾方旌擢以勵事君者且往為盜可

妄殺人今將安百姓定天下而害忠臣乎即令其軍曰
先與琮有隙敢妄動者罪三族乃授琮瀛州刺史始都
樂壽號金城宮冬至大會僚吏有五大鳥集其宮羣鳥
從之又宗城人獻玄圭一景城丞孔德紹曰昔天以是

授禹今瑞與之侔國宜稱夏建德然之

按是時始改國號曰夏新書於

建元丁丑之前已書更號夏王者誤也今刪彼存此

改元五鳳以德紹為內史侍

郎初上谷賊王須拔自號漫天王以兵畧幽州戰死其
將魏刀兒領其眾壁深澤眾十萬建德以計襲取之并

有其地

新書載在大業十二年今從舊書

武德二年

新書作元年誤

宇文化及

至魏縣建德謂其納言宋正本及德紹曰化及大逆不

道吾欲為天下誅之何如正本等皆曰善

按建德起於庫盜非真為

隋報讐新舊書載建德與其臣語甚詳今皆刪

即引兵討化及連戰破之化及

保聊城乃縱撞車機石四面乘城拔之建德入先謁蕭

皇后語稱臣執宇文智及楊士覽元武達許弘仁孟景

等召隋文武官共臨斬之梟首棘門囚化及并其子載

以檻車至大陸縣斬之

按隋書云載之河間斬之通鑑云至襄國殺之今據新舊唐書

建德性約素不喜食肉飯脫粟加蔬其妻曹未嘗衣紈綺每下城破敵貲寶並散賚將士至是得隋宮人千數皆放去乃以誅化及報越王侗封為夏王以隋黃門侍

郎裴矩為尚書右僕射

舊書作左僕射

兵部侍郎崔君肅為侍

中少府令何稠為工部尚書餘隨才署職委以政事有願往關中及東都者聽仍給道里費以兵護出於境八月攻洛州陷之遂遷都焉更號萬春宮遣使朝侗與王世充結歡俄而世充廢侗乃絕之始建天子旌旗出入

警蹕書稱詔追謚隋煬帝為閔帝以齊王暕子政道

宰相

世系表楊慎矜
突厥傳作正道

為郿公義成公主在突厥遣使迎蕭后

建德自將千餘騎送之并獻化及首未幾連突厥侵相
州刺史呂珉死之進攻衛州執河北大使淮安王神通
同安長公主黎陽首將李世勣釋之復使世勣守黎陽
館王公主饋以客禮滑州刺史王軌為奴所殺以首奔
建德建德曰奴殺主大逆命斬奴而返軌首滑人德之
遂降齊濟二州亦降充賊徐圓朗聞風送款三年世勣

自拔歸國吏白建德誅其父建德曰世勣唐臣不忘其
主忠也父何罪釋不問高祖遣使修好建德即以公主
等歸京師嘗執趙州刺史張志昂

舊書作張昂

邢州刺史陳

君賓大使張道源等將殺之國子祭酒凌敬諫曰彼悉
力堅守以窮就禽仗節士也今殺之無以勸建德怒曰
我傳其城猶不下勞費士旅何可赦敬曰王之將高
士興抗羅藝於易南兵未交士興即降可乎建德悟即
釋之建德大將王伏寶數持兵功畧在諸帥上或讒其

反建德殺之伏寶臨死呼曰我無罪王何信讒自刈左

右手乎後戰數不利納言宋正本好直諫建德復聽讒

言殺之政教益衰

據舊書增

九月建德自帥師圍幽州為羅

藝所敗藝乘勝襲其營建德陣營中填塹而出敗藝眾

進薄其城不能拔乃還

通鑑載此事在十月

濟陰賊孟海公兵三

萬據周橋城以掠河南建德自擊之會秦王伐東都其

中書舍人劉斌

通鑑作劉彬

獻說曰唐據關內鄭王河南夏

有冀方此鼎足相持勢也今唐鄭二國兵不解唐疆鄭

弱勢必舉鄭鄭滅則夏有齒寒之憂為大王計莫若援
鄭使鄭抗其內我攻其外唐之兵必卻唐卻而鄭完然
後徐觀其變鄭若可圖因而取之并二國兵乘唐師老
長驅而西關中可遂有也建德曰善會世充遣兄子琬
及長孫安世乞師建德即令其臣李大師魏處繪詣唐
請解鄭圍秦王留之不答四年建德克周橋虜海公留
其將范願成之悉發海公徐圓朗之衆并兵號三十萬
救世充至滑州世充行臺僕射韓洪開城納之進逼元

梁管三州皆陷遂屯滎陽運糧汴河西上舟相屬不絕
壁成臯東原築營板渚遣使與世充約期三月秦王進
據虎牢翌日以騎五百覘建德營設伏道側獨與數騎
進未至賊營三里覺賊出騎追之王漸卻誘至伏所卒
起奮擊賊騎驚引去追斬三百級獲其將殷秋石瓚建
德失二將又聞唐兵精頓六十日不敢西其諸將又新
破海公掠獲盈給日夜思歸凌敬說建德曰今唐以重
兵守虎牢我若悉兵濟河取懷州河陽以重將戍之然

後鳴鼓建旗踰太行入上黨傳檄旁郡進壺口以駭蒲
津收河東地此上策也且有三利乘虛擣境師有萬全
一也拓土得衆二也鄭圍自解三也建德將從之而王
琬長孫安世日請兵西又陰齎金王啗諸將以撓其謀
衆乃曰凌敬書生豈知戰建德乃謝敬曰今士心銳天
贊我也方用衆議不得如公言敬固爭建德怒命扶出
其妻諫曰祭酒計甚善夫自滏口道乘唐之虛連營漸
進以取山北因招突厥西抄關中唐必還師自救鄭難

紆矣今頓兵虎牢下徒自苦恐無功建德曰此非女子所知且鄭朝暮待吾來既許之豈可見難而退

謹按通鑑輯覽

御批胡寅以凌敬之策雖善而汾晉蒲坂非不戰所能下若延引日月世充破而建德仍不免於亡此老生常談耳使建德是時果集兵向秦如孫贖之直趣大梁未必不足以奪洛陽城下諸軍之氣特為諸將所惑一戰被擒所謂神昧當幾非天奪其魄者歟五月自板渚出為陣西薄汜南屬鵲山亘二十里鼓而前秦王登虎牢城望其軍按甲不戰曰賊起

山東未嘗見大敵今度險士囂令不肅也逼城而陣有輕我心待其饑破之果矣日中建德士皆坐列渴爭飲

意益怠王麀軍先登騎怒塵大漲乃率史大柰秦叔寶
纏糜幟馳出賊陣後建德軍顧而驚遂大潰建德被重
創竄牛口谷車騎將軍白士讓楊武威獲之傳而西斬
長安市年四十九建德妻與其左僕射齊善行以騎數
百遁還洺州餘黨欲立其養子為主善行曰夏王奄定
河朔號為威彊今一出不復非天命有歸哉不如委心
請命無為塗炭生民也遂分府庫散給將士令各解去
善行乃與右僕射裴矩行臺曹旦率官屬及建德妻并

傳國八墾來降建德起兵至滅凡六年

薛舉蘭州金城人

舊書云河東汾陰人父汪徙居金城

善射殖產鉅萬好

結納邊豪為長雄隋大業末任金城府校尉隴西盜起

金城令郝瑗將討賊募兵數千檄舉將始授甲大會置

酒舉與子仁果

通鑑考異曰唐高祖實錄先作仁果後作仁果新舊高祖太宗紀薛舉傳柳芳

唐歷柳宗元集皆作仁果太宗實錄吳兢太宗勳吏草命紀焦璐唐朝年代記陳嶽唐統記皆作仁果今醴泉

昭陵前有石馬六匹其一銘曰白蹄烏

平薛仁果時所乘此最可據今從之 及其黨劫瑗於

坐矯稱捕反者即起兵囚郡縣官發粟以賑貧乏自號

西秦霸王建元泰興以仁果為齊公少子仁越為晉公
它賊宗羅睺帥眾下之以為義興公更招附餘盜割馬
牧兵鋒甚銳所徇皆下隋將皇甫綰兵萬人屯枹罕舉
以精卒二千襲之過於赤岸大風且澍逆舉陣綰不擊
俄反風綰屯氣色曠暝部伍錯亂舉介騎先眾乘之綰
陣大潰進陷枹罕岷山羌鍾利俗以眾二萬降舉大振
進仁果為齊王東道行軍元帥羅睺為義興王副之

通鑑

作興

王仁越晉王河州刺史因徇下鄯廓二州不闕旬盡

有隴西地衆十三萬

按隋書煬帝紀通鑑薛舉率衆反在大業十三年四月新舊書本傳

但書大業末至借號蘭州

始書十三年未詳孰是

通鑑

曰唐高祖實錄武德元年四月

辛卯舉稱尊號今從唐書舉傳

以妻鞠為后仁果為太

子使仁果圍秦州仁越趨劍口掠河池太守蕭瑀拒卻

之遣將常仲興渡河擊李軌與軌將李贇戰昌松仲興

敗軍沒於軌仁果克秦州舉往都之仁果寇扶風汧源

賊唐弼拒之不得進初弼立李宏芝為天子有衆十萬

舉遣使招弼弼殺宏芝從舉仁果聞弼無備襲之盡奪

其衆弼以數百騎走軍益張號二十萬將窺京師會高祖入關遂留攻扶風秦王擊破之斬首數千級逐北至隴還舉畏王踰隴追之問其下曰古有降天子乎黃門侍郎褚亮曰趙佗歸漢劉禪仕晉近世蕭琮其家今存轉禍為福自古有之衛尉卿郝瑗曰亮之言非也昔漢祖兵屢敗蜀先主嘗亡其妻子卒成大業豈可一不勝便為亡國計乎舉亦悔其言乃曰聊試公等即厚賜瑗以為謀主瑗請連梁師都厚賂突厥合從東向舉從之

約突厥莫賀咄設犯京師會都水監宇文歆使突厥歆說

止其兵故舉謀塞武德元年豐州總管張長遜

一作長遜古

通擊羅睺舉悉兵援之屯析墪以游軍掠岐幽秦王禦

之次高墪度舉糧少利速鬪堅壁老其兵會王疾卧屯

不出而舉數挑戰行軍長史劉文靜殷開山觀兵於高

墪

殷開山傳作析墪誤析墪在涇州保定縣仁果嗣立都此

恃眾不設備舉兵掩其

後遂大敗死者十六大將慕容羅睺李安遠劉弘基皆

沒王還京師舉拔高墪仁果進逼寧州郝瑗謀曰今唐

新破將卒禽俘人心搖矣可乘勝直趨長安舉然之方
行而病召巫覘視言唐兵為祟舉惡之未幾死仁果代
立偽謚舉武皇帝未葬而仁果滅

仁果多力善騎射號萬人敵性賊悍每破陣軍獲俘必
斷舌刈鼻或春斮之嘗得庾信子立怒其不降磔之火
漸割以啖士拔秦州取富人倒懸以酢注鼻或杙其隱
以求財舉每戒曰汝才畧足辦事而傷於虐終覆吾宗
及繼立諸將素有隙者咸猜懼郝瑗哭舉病不起繇是

兵稍衰秦王率諸將復壁高墪諸將請戰王曰我軍新
血銳氣少賊驟勝而驕我心我閉壁以折之伺衰
而擊可一戰禽也因令軍中曰敢言戰者斬久之仁

果糧乏挑戰不許

謹按通鑑輯覽

御批秦王用兵之長大約始以持重養銳繼以深入赴機前
後屢戰屢勝歷歷不與雖英畧天授然兵家言靜若處女
狡若脫兔者正
復不外此道

其將牟君才內史令翟長遜

舊書作長孫
或作長遜

以眾降左僕射鍾俱仇以河州降王策賊可破遣將軍
龐玉擊宗羅睢於淺水原戰酣王以勁兵擣其背羅睢

敗王悉軍馳之夜半至析城遲明圍合仁果率偽官屬

降王受之以仁果歸京師及酋黨數十人皆斬之舉父

子盜隴西五年滅

按舉以隋大業十三年丁丑據隴西唐武德元年戊寅仁果亡實止二年

新舊本傳俱作五年疑轉寫之謬或初仁果降諸將賀

隋號在十三年而起事實在十年乎

且問曰羅睺雖破而賊城尚堅王能下之何也王曰羅

睺健將非急追之使得還城未可取也故吾使賊不及

計是以克之諸將悅服初羌豪旁公地

通鑑作金地

附薛舉

及仁果敗亦來降留長安公地不樂帥其眾叛

新書公地降詔

即統其眾未幾復叛今從通鑑

入南山繇商洛出漢川所過剽害至始

州掠王氏女醉寢於野王取衾地所佩刀斬之送首梁州詔封女為崇義夫人

李軌字處則涼州姑臧人以財雄邊好賙人急隋大業中補鷹揚府司馬薛舉亂金城軌與同郡曹珍闕謹梁碩李贇安修仁等計曰舉暴悍今其兵必來吏孱怯無足與計者欲相戮力據河右以觀天下變庸能束手以妻子餌人哉眾允其謀共舉兵然莫適敢主曹珍曰我

聞讖書李氏當王今軌賢非天啟乎遂共降拜以聽命
修仁夜率諸胡入內苑城建旗大呼軌集眾應之執虎
賁即將謝統師郡丞韋士政遂自稱河西大涼王署官

屬

按隋書煬帝紀及通鑑事在大業十三年

初突厥昌婆那可汗弟達度闕

設內屬保會寧川至是稱可汗降於軌謹等議盡殺隋
官分其產軌曰諸公既見推當稟吾約今軍以義興意
在救亂殺人取財是為賊何以求濟乎迺以統師為太僕
卿士政太府卿會薛舉遣兵來侵軌遣將敗之昌松斬

首二千級悉虜其衆軌縱還之李贇曰今力戰而俘又縱以資敵不如盡阬之軌曰不然若天命歸我當禽其主此皆我有也不者留何益未幾拔張掖燉煌西平枹罕悉有河西武德元年高祖方事薛舉遣使慰結謂軌為從弟軌喜乃遣弟懋入朝帝拜懋大將軍還之詔鴻臚寺少卿張俟德持節冊拜軌涼王會軌僭帝位建元安樂

按隋書煬帝紀及舊書軌傳初稱涼王即改元安樂今據新書及通鑑

以其子伯

王為太子長史曹珍為尚書左僕射攻陷河州俟德至

軌名其下議曰一姓不可競王今欲去帝號東向受冊
可乎曹珍曰業已為天子奈何受人官必欲以小事大
請行蕭譽故事稱梁帝而臣於周軌從之乃遣其尚書
左丞鄧曉來朝奉書稱從弟大涼皇帝臣軌而不受官
爵帝怒囚曉不遣初軌以梁碩為謀主授吏部尚書碩
有莫畧見故西域胡種族盛勸軌備之因與戶部尚書
安修仁交怨又軌子仲琰嘗候碩碩不為起仲琰憾之
乃相與譖碩軌不察齋鳩其家殺之繇是故人稍疑懼

不為用有胡巫妄曰上帝將遣玉女從天來遂召兵築臺以候女多所糜損屬薦饑人相食軌毀家貲賑之不能給議發倉粟曹珍亦勸之謝統師等故隋官內不附欲離沮其衆乃廷詰珍曰百姓多餓死皆弱不足事者壯勇士終不肯困且儲廩以備不虞豈宜妄散僕射苟悅人情非國計軌曰善乃閉粟下益怨修仁凡興貴在長安自表詣涼州招軌帝曰軌據河西連吐谷渾突厥今興兵討擊尚為難單使弄頰可下邪興貴曰軌盛彊誠

然若曉以禍福逆順宜聽如憑固不受臣世涼州豪望
多識其士民而修仁為軌信任典事樞者數十人若候
隙圖之無不濟帝許之興貴至涼州軌授以左右衛大
將軍因間訪以自安策興貴對曰涼州地不過千里無
險固自守又濱接戎狄匪我族類若舉河西地奉圖東
歸雖漢竇融未足吾比軌不答久之曰昔吳王濞以江
左舉兵猶稱己為東帝我今居河右不得為西帝乎君無
為唐誘致我興貴懼謝曰竊聞富貴不居故鄉如衣錦

夜行今合宗蒙任敢有他志興貴知軌不可以說乃與
修仁等潛引諸胡兵圍其城軌以步騎千餘出戰先是
薛舉柱國奚道宜率羌兵奔軌軌許以刺史而不與道
宜怨故共擊軌軌敗入城引兵登陴須外援興貴傳言
曰唐使我來取軌不從者罪三族於是諸城不敢動
軌嘆曰人心去矣攜妻子上玉女臺屬酒為別修仁執送
之斬於長安自起至亡凡三年詔以興貴為右武侯大
將軍封涼國公

李愷傳稱右驍衛大將軍
歸國公安興貴與此小異

修仁左武侯

大將軍申國公鄧曉聞執敗入賀帝曰而委質李軌聞其亡不少感乃蹈朴以悅我不盡心於軌能竭節於我乎遂廢不齒

劉武周瀛州景城人父匡徙馬邑武周驍悍善騎射喜交豪傑兄山伯嘗詈辱之曰汝不擇所與必滅吾宗武周因去至洛為太僕楊義臣帳下募征遼有功補建節校尉還馬邑為鷹揚府校尉太守王仁恭以其州里雄頗愛遇之令總虞侯直閣下久之盜仁恭侍兒懼覺誅

又見天下已亂陰有異計因宣言於衆曰今歲饑死者骨相枕於野府君閉倉不恤豈憂百姓意乎軍皆憤怒武周知衆心搖動因稱疾卧家豪傑往候謁遂大言曰壯士豈能死溝壑今官粟紅腐於倉誰能與我共取之諸惡少年皆願從隋大業十三年與其徒張萬歲等十餘人候仁恭視事武周上謁萬歲自後入斬仁恭持首出徇郡中無敢動者遂開倉賑窮絕馳檄屬城皆下得兵萬餘自稱太守

通鑑考異曰創業注云二月己丑馬邑軍人劉武周殺太守王仁恭據其

郡自稱天子國號定楊按唐書武
周據汾陽宮乃僭號於時未也 遣使附突厥雁門陳

孝意虎賁郎將王智辯合兵圍其桑乾鎮會突厥至武
周與共擊智辯破之孝意奔還雁門雁門人殺之以城
歸武周武周因襲破樓煩進據汾陽宮取宮人賂突厥
始畢可汗報以馬其衆遂大攻得定襄突厥以狼頭纛
立武周為定楊可汗僭稱皇帝以妻沮為后建元天興
初上谷賊宋金剛有衆萬餘與魏刀兒連和刀兒為寶
建德所攻金剛救之大敗率餘衆四千歸武周武周素

聞金剛善兵得之喜封為宋王屬以軍分家貨半遺之
金剛亦自結出其妻而聘武周妹說武周取晉陽南向
平天下武周授金剛西南道大行臺武德二年總兵二
萬侵并州次黃蛇鎮又連突厥鋒無前遂破榆次拔介
州進圍太原詔遣太常少卿李仲文禦之為賊所執舉
軍沒仲文逃還賊因破平遙取石州殺刺史王儉略浩
州詔右僕射裴寂為晉州道行軍總管拒之寂戰敗績
齊王元吉委并州遁武周入據之遣金剛攻陷晉州執

右驍衛將軍劉弘基進破滄州夏縣人呂崇茂殺其令
自號魏王以應賊隋河東守將王行本與武周合關中
震動高祖詔秦王督兵進討自龍門渡河屯柏壁與金

剛相持

據通鑑增

又詔永安王孝基等攻夏縣不克賊將尉

遲敬德襲破孝基軍

詳見孝基傳

將還滄州秦王邀戰破之

於美良川敬德復與別帥尋相援王行本於蒲王又破
卻之蒲州降武周攻李仲文於涪州不勝遣將黃子英
護饗道驃騎大將軍張德政襲斬之虜其衆武周部將

稍離金剛以糧道乏卒饑引去王追至雀鼠谷一日八戰皆破之斬級數萬金剛走介州官軍迫之以餘衆二萬出西門背城陣亘七里王令李世勣程知節秦叔寶為北軍翟長慈秦武通為南軍既戰小卻王以精騎突擊破之金剛將輕騎去賊將尉遲敬德尋相張萬歲降收其精兵遂復介州武周聞金剛敗大懼棄并州北走突厥金剛收散卒將復戰衆不為用亦奔突厥并州平未幾金剛背突厥欲還上谷為追騎所斬武周亦謀歸

馬邑計露突厥殺之起兵六年而滅

苑君璋者武周妹婿也武周將南侵君璋諫曰唐以一州兵掇取三輔所向風靡此殆天命不可爭也太原而南多巖阻若懸軍深入恐後無繼不如連突厥與唐合從南面稱孤是為上策武周不聽使君璋守朔州引衆內侵及敗泣曰不用君言乃至此武周死突厥以君璋為大行臺統武周部曲使郁射設監其兵高祖遣使招之部將高滿政勸君璋盡殺突厥以降唐君璋不從滿

政因衆心夜脅君璋君璋奔突厥滿政以馬邑來降拜朔州總管榮國公君璋復引突厥攻陷馬邑殺滿政夷其黨乃去退保恒安所部多叛去勢蹙請降高祖遣使賜之金券會頡利亦名之意猶豫子孝政諫曰大人許降唐又貳頡利自取亡也今糧盡衆攜不即決恐矜肘變生即單騎南奔君璋諭返之名衆與議恒安人郭子威曰恒安山川形勝足以自固突厥方強我倚之可觀天下變何遽降唐君璋然之執唐使送突厥與突厥寇

馬邑犯太原邊人苦之久之見頡利政亂率所部降入

朝拜安州都督

通鑑作隰州都督
今從新舊二史

封芮國公食五百戶

君璋不曉書然天資習事歷職有惠稱貞觀中卒

按君璋降

唐以後無他表見又翻覆持兩端非唐功臣可比
新書與李子和等別為列傳今從舊書附武周傳

高開道滄州陽信人世煇鹽為生少趨勇走及奔馬隋

大業末依河間賊格謙謙為隋兵圍捕左右奔散開道

獨身決戰殺數十人謙得免遂引為將軍謙滅與其黨

百餘人亡海曲復出剽滄州衆稍附因北掠戍保自臨

渝至懷遠皆破有之復引共圍北平隋守將李景度不能支拔城去武德元年陷漁陽郡有鎧馬數千衆萬人

自號燕王改元始興

通鑑考異曰實錄唐書皆無開道年號柳璨泣正閔位歷云年號天

成宋庠紀年通譜開道年號始興未知孰是

先是懷戎浮屠高曇晟者因縣

令具供與其徒襲殺令偽號大乘皇帝以尼靜宣為耶輸皇后建元法輪遣使約開道為兄弟封齊王開道引衆從之居三月殺曇晟并其衆竇建德圍羅藝於幽州藝請救開道以騎二千赴之建德解去乃因藝使請降

詔以為蔚州總管北平郡王賜姓李開道以輕騎五百
抵幽州欲圖藝自從數騎入都督府且觀藝藝與張飲
盡歡知不可圖遂去五年幽州饑開道許輸以粟藝遣
老弱湊食皆厚遇之藝悅不為虞更發兵三千車數百
馬驢千往請粟開道悉留不遣遂北連突厥告絕於藝
復稱燕與劉黑闥聯兵入寇開道攻易州不克遣將謝
稜詭降於藝請兵應接藝衆至稜縱擊破之因道突厥
俱南恒定幽易等騷然罹患頡利以開道善攻具與俱

攻馬邑拔之時羣盜相繼平開道欲降自疑反覆得罪
猶恃突厥自安然將士多山東人思歸衆益厭亂初開
道募壯士數百為養子衛閣下及劉黑闥將張君立亡
歸開道命與愛將張金樹分督之金樹潛令左右數人
偽與諸養子戲至夕入閣絕其弓弦又取刀稍聚牀下
既暝抱之趨出金樹以其徒譟攻之諸養子將搏戰亡
弓稍君立舉火外城應之帳下大擾開道顧不免探甲
抵牒據堂坐與妻妾奏妓飲酒金樹畏不敢前天且明

開道先縊其妻妾及諸子而後自殺金樹羅兵取養子
皆斬之亦殺君立而歸開道起兵凡八年滅詔以金樹
為北燕州都督

劉黑闥貝州漳南人嗜酒亡賴父兄患苦之與竇建德
少相友隋末亡命從郝孝德為盜後事李密為裨將密
敗王世充虜之以其武健補馬軍總管鎮新鄉竇建德
攻新鄉虜黑闥用為將封漢東郡公建德有所經畧常
委以斥候陰入敵中覘虛實乘隙奮竒兵出不意多所

摧克軍中號為神勇武德四年建德敗還匿漳南杜門
不出會高祖召建德故將范願董康買曹湛高雅賢將
用之願等疑畏謀曰王世充舉洛陽降驍將楊公卿單
雄信之徒皆夷滅今名吾等若西入關必無全且夏王
於唐固有德往禽淮安王同安公主皆厚遣還之今唐
得夏王即加害我不以餘生為王復讎無以見天下義
士於是謀反卜所主劉氏吉共往見故將劉雅告之不
從衆怒殺雅去范願曰漢東公黑闥果敢多奇畧今欲

收夏王亡衆集大事非其人莫可乃之漳南謁黑闥以
告黑闥喜椎牛饗士得兵百餘人襲漳南縣破之貝州
刺史戴元祥魏州刺史權威合兵討擊皆敗死建德故
時左右稍歸之兵寢盛乃設壇漳南祭建德自稱大將
軍陷歷亭殺守將王行敏饒陽賊崔元遜攻陷深州殺
刺史裴晞應之兗州賊徐圓朗亦相連和遂取瀛州攻
定州殘之乃移檄趙魏建德將卒往往殺官吏附賊進
至宗城衆數萬黎州總管李世勣戰敗走洺州黑闥追

之步卒五千皆覆世勳挺身免黑闥遣使北結突厥頡
利頡利遣侯斤宋邪那率騎從之軍大振不半年盡有
建德故地高祖詔秦王及齊王元吉討之五年黑闥陷
相州號漢東王建元天造以范願為左僕射董康買兵
部尚書高雅賢為左領軍王小胡為右領軍召建德僚
屬悉復用之都洺州秦王率兵次汲數因賊進下相州
二月秦王破之於列人取洺水使總管羅士信守之黑
闥攻陷洺水士信死王阻水為連營分奇兵絕其餽路

黑闥數挑戰堅壁不為動三月賊糧盡王度必決戰豫
壅洺水上流敕吏曰須賊渡亟決之黑闥果率騎二萬
絕水陣與王師大戰衆潰水暴至賊衆不得還斬首萬
餘級溺死數千黑闥與范願等以殘騎奔突厥山東平

秦王還黑闥藉突厥兵復入寇攻定州舊將曹湛

新書
作曹

該今從舊
史及通鑑

董康買先逃鮮虞聚兵應之詔淮陽王道玄

為河北總管討黑闥戰敗死

詳見道
玄傳

繇是河北復叛黑

闥仍都洺州九月詔齊王元吉擊之

通鑑在十月道建
成將兵則在十一

月不進又詔皇太子建成督兵并力頻戰皆捷十二月

與黑闥戰於魏州城下破之追北至毛州

新書傳皇太子齊王恚兵

戰館陶黑闥大敗引軍走躡北至毛州按館陶即毛州新史分為二地誤今從高帝實錄

黑闥整衆

背永濟渠陣縱騎搏之賊赴水者數千黑闥遁去騎將

劉弘基追蹙賊不得休明年正月馳至饒陽騎能屬者

纔百餘困且餒黑闥所署總管崔元遜迎拜延之入黑闥

不許元遜固請且泣乃進城下元遜饋之方飯車騎諸

葛德威

舊書本傳及高祖紀作葛德威

勒兵前黑闥罵曰狗輩負我遂

執詣皇太子所斬之德威舉郡降山東遂定餘常及突厥兵間道亡定州總管雙士洛邊戰破平之

徐圓朗者兗州人隋末為盜據本郡以兵徇琅邪以西北至東平盡有之勝兵二萬附李密密敗歸竇建德山東平授兗州總管魯郡公會黑闥兵起圓朗執安撫使盛彥師應之自號魯王黑闥以為大行臺元帥兗鄆陳杞伊洛曹戴等州豪傑皆殺吏應賊秦王已破黑闥遣兵屯濟陰經畧之圓朗懼河間人劉復禮說圓朗曰彭

城有劉世徹才畧不常將軍欲自用恐敗不如迎世徹立之功無不濟圓朗謂然乃迎之或說圓朗曰聞公迎

劉世徹信乎公亡無日矣獨不見翟讓用李密哉

通鑑考異

曰草命記云盛彥師以世徹有虛名恐二人相得為患益深因說圓朗使不納按實錄彥師奔王薄與薄共殺李義滿三月戊戌王薄死丁未黑闥乃敗彥師在圓朗所時黑闥未敗也今稱或說以闕疑按新書亦以為彥師語今從通鑑圓朗信之世徹至奪其兵以為司馬遣徇地所

至皆下復忌而殺之淮安王神通李世勣合兵攻圓朗圓朗數敗窮蹙棄城與數騎夜亡為野人所殺

欽定續通志卷二百一